



Kingornussisarnermik Inatsisip, aappariit pigisaasa agguarnerat pillugu Inatsisip, toqusup pigisaasa agguarneqarnerat pillugu Inatsisip aamma eqqartuussisarnermik Inatsisip, akiliisinnajunnaarneq pillugu Inatsisip, eqqartuussivikkoortumik nalunaarsuineq pillugu Inatsisip, aappariinnerup inatsisitigut sunniutai pillugit inatsisip kiisalu inatsisit allat allangortinneqarnerisa (Toqusup pigisaasa agguarnerat pillugu Inatsisip malitsigisaanik allanguinerit) Kalaallit Nunaanni atuutilersinneqarnerannik peqqussutissatut missingiummut Namminersorlutik Oqartussat isumaqataanerat pillugu Inatsisartuni aalajangiiffigisassatut siunnersuut.

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiisitaanermullu Naalakkersuisoq)

(Siullermeerneqarnera)

Isummerfigisassatut siunnersuutip siunertaraa, Kunngip peqqussutaasa arlallit akuersaarnersigut, tassanilu inatsisit arlallit qulequttami imarisaasut allangortissagigut. Siunnersuut annertoorujussuuvoq, taamaattumillu Inatsisinut ataatsimiititaliaq piffissaqarluartariaqarpoq inatsisissatut siunnersuutit aappasaaniinnginneranni sukumiisumik misissuataarinissaminut. Taamaattumik siunnersuut ataatsimiititaliamut suliareqqitassanngorlugu innersuupparput Demokraatiinillu ima oqaasertalerlugu:

Iluarisimaartorujussuuarput, suliffeqarfinit piginnittut maanna qanigisaminnik toqusoqarsimatillugu aappariinnerup qanoq issusianik nalunaarsuisinnaanngormata. Qimagaasunut inuiaqatigiinnullu pingaaruteqartorujussuuvoq, suliffeqarfiit ingerlalluartut "ingerlaannarnissaat" aamma piginnittup peerutereernerani. Taamaaliorneq suliffinnik attassiinnarnissamut periarfissiisooq, ilaqutariit ataasiakkaat inuuniarnerminni tunngaviannut pingaarutilerujussuaq, aammalu inuiaqatigiinnut tamarmiusunut tamanna soqutigisarivaa.

Tulliattut siunnersuutigineqarput inatsisit allangortinneqarnissaat, avissaarnermi qanigisamillu toqumut annasaqarnermi pisinnaatitaaffinnut tunngasoq, aappariinnut katissimanngitsunut aappaasumullu tunngassuteqartut, taakkulu annertuumik takutippaat inuiaqatigiittut inooqateqariaasitsinnik allangortoqarsimanerannik nikeriartornerput akuerigipput, qallunaatut oqaatigalugu mutiunerusutut inuuneqalersimanerput. Siusinnerusukkut taakku ileqqut aappariinnermilu inatsisitigut sannat inatsimmut atuuttumut naleqqussagaasimapput. Taamaattumik iluarisimaarparput, inuiaqatigiitsinni allanguutit taakku aamma inatsisit allangortinnissaannut siunnersuutini mutinngorsimanitsinnut tulluussarneqarmata.

Inuunermi atugassarititaavoq, annerusumik minnerusumilluunniit qanigisatsinnik toqukkut annasaqartassasugut. Annaasaqarneq ajornartoornermik malitseqakkajuttoq, ilaqutariinnut tamanut kingornussassanut tunngatillugu alianartumik sunniisartoq. Inuiaqatigiitsinni inuppasuarnut tamanna pingaaruteqartuummat, pissusissamisoorsoraarput nassuiarluarneqarnissaat, inatsimmi allanguutit taakku inuiaqatigiinnut pitsaasumik sukumiisumillu paasissutissiisutiginerarnissaat pisariaqartoq, taamaaliornikkut suliniutit pitsaasut innuttaasunut kingunissaat ersarissarneqassammat.